

續修陝西省通志稿

第九十五冊

卷一百八十一至一百八十二

續修陝西通志稿卷一百八十一

紀事十五

西巡本末三

四月癸丑奕劻李鴻章電致行在軍機處醇親王赴德一事正月咸電已詳陳昨德穆使因賠款息銀議定欲催早去頃接呂使覃電德君以專使現可舉行屆時當優禮接待應請降旨特派醇親王爲頭等出使大臣並令前閣讀學張翼副都統蔭昌隨往贊助一切臣等猶慮該員等情形未熟與瓦帥商酌添派德員隨行德君性急醇去恐難遲緩可否令其不必遠赴行在請訓致需時日國書禮物即代豫備瓦來辭行定明早起程先赴日本其兵隊約兩禮拜後可陸續撤回并附聞謹奏上諭醇親王載灃著授爲頭等專使大臣前赴大德國敬謹將命前內閣侍讀學士張翼副都

統廕昌均著隨同前往參贊一切甲寅諭翰林院爲儲才重地在館各員自應講求實學通達古今以備朝廷任使乃近日風氣專以詩賦小楷爲工敝精神於無用而經世事務或轉不暇考求殊非造就人才之意茲當變通政治之初允宜首先整頓嗣後編檢以上各官應專課政治之學以大清會典六部則例爲宗旁及古今政書直省通志凡有關經濟者皆當究心他如條約公法以及天算格致諸書聽其分門肄習其有願赴南北洋學習者亦准其在本署呈明咨送前往著掌院學士酌定課程每月呈送劄記擇其議論切實確有見解者選錄進呈量予獎勵其紕繆不正有害士習者分別參劾凡散館大考考差均應一律變通著掌院學士妥擬章程咨送政務處王大臣覆核請旨辦理朝廷側席旁求冀得通儒碩彥朝夕論思用恢治道其各爭自濯磨以副朕求治作

人之至意丙辰諭上年七月以來倉卒播遷朕侍皇太后暫駐關中瞬將經歲睽懷宗社時切疚心今和局已定昨經諭令內務府大臣掃除宮闕亟欲即日回鑾惟現在時令已交仲夏天氣炎熱聖母高年理宜衛攝起居以昭頤養萬難於溽暑之際跋涉長途自應俟節候稍涼啟蹕茲擇於七月十九日朕恭奉慈輿由河南直隸一帶回京著各該衙門先期敬謹預備將此通諭一體咸知俾慰天下臣民之望丁巳電諭奕劻李鴻章現已定期回鑾京師各使館酌留兵隊前據奏各國統計不過數百名究竟確留若干使館租界逼近禁城聞有築城設礮臺之說擬飭電詢並令設法商阻著即電覆又鐵路亟應收回俾免火車入城津京沿途洋卡洋兵酌留數目以少爲妥以上各節均關緊要該王大臣務須切實商定一面先將情形電奏爲要洋兵撤後地面匪徒尤須嚴防

查拿以昭肅靜己未崑岡奏查光緒二十六年五月間具奏翰林院衙門情形時適當鎗林礮雨之中役徒驚慌星散逃避第以傳聞之說猝然呈報臣入奏時又因時事倥傯未能詳察情形今準全權大臣轉鈔英國全權大臣照會臣始知上年五月二十七日翰林院衙署種火根由實係當日亂軍趁風縱放所致確非西人焚毀且聞延燒時西人尙敦睦誼出力救援臣不敢以陳奏在先稍涉回護相應自行檢舉據實更正得旨著即更正庚申上諭本日奕劻李鴻章具奏各國議定滋事地方停止文武各考試五年一摺據稱順天太原地方鄉試仍應停止其單開山西省之太原府忻州太谷縣大同府汾州府孝義縣曲沃縣大甯縣河津縣岳陽縣朔平府文水縣壽陽縣平陽府長子縣高平縣澤州府隰州蒲州絳州歸化城綏遠城河南省之南陽府河內縣鄭州光州陳

州府浙江省之衢州府直隸省之北京順天府保定府永清縣天津府順德府望都縣獲鹿縣新安縣通州武邑縣景州灤平縣東三省之盛京甲子廠運山千慶街北林子呼蘭城陝西省之甯羗州江西省之鄱陽縣湖南省之衡州府等地方均應停止文武小試五年著各該省督撫學政遵照辦理出示曉諭壬戌以升允爲陝西巡撫李紹芬爲陝西布政使癸亥諭回鑾業已定期吏部右侍郎張英麟戶部左侍郎吳樹梅兵部左侍郎葛寶華都察院左副都御史何乃瑩國子監祭酒王埶鑲黃旗滿洲副都統敬昌鑲紅旗蒙古副都統黃永安均著先行回京供職各部院人員由隨扈堂官每衙門酌留數員外其餘著該堂官飭令分起回京由戶部酌給川資津貼以示體恤五月丁卯奕劻李鴻章電致行在軍機處昨據德穆使照稱奉本國電諭德皇擬乘本年華曆七月二

十日大閱駐紮德國京師御林軍之便堪以接待醇親王並諭達知妥爲豫備俾得趨程及時到柏林不誤等因現商令醇王整裝豫備一切國書禮物均趕辦穆使面稱六月初五日有德公司船自滬開行可搭坐約五月廿六七由京起程請代奏軍機大臣奉旨奕劻等電悉醇親王載灃初次出洋一切言動諸宜謹慎飲食起居隨時調護並著張翼等悉心照料妥慎贊襄禮畢即行回國仍將外洋風土人情隨地留心體察而資閱歷諭軍機大臣等現在撤兵限期僅有十日究竟各國兵隊果如期全撤否覲見禮節如何定議迄未據奏教案續行議處人員亦未據商定覆奏當不至因此延宕又生枝節該王大臣膺此重任責有攸歸著即迅速電覆其通商行船約章亦須及時妥議前有旨令盛宣懷會同商辦是否應在京會議抑在滬邀集洋商先行妥議並著妥籌電奏

仍知照盛宣懷遵照又民教專約關係甚重亟應趁此與各國會商定立妥協章程奏明通飭遵照以杜後患而顧邦交癸酉奕劻李鴻章電致行在軍機處那桐出使日本應有國書該國向例索觀敕諭茲謹擬就國書敕諭照錄於下國書文曰大清國大皇帝敬致書於大日本國大皇帝陛下朕維中國與貴國同在亞洲海程密邇彼此遣使駐紮以來誠信相孚情誼彌摯乃上年五月京師猝遭拳匪之亂兵民交訐貴國使館書記生杉山彬竟致被戕殞命該書記生隨使來華應獲保護之益不意變生倉猝遽爾捐軀朕自維薄德未能先事預防致令友邦官員慘遭不測有傷睦誼彌切疚心業派大臣致祭並頒發內帑以示優卹茲派頭品頂戴戶部右侍郎那桐爲欽差專使大臣親齎國書前往貴國呈遞該大臣忠誠素著朕所深信特令敬謹將事表明惋惜之懷藉達

優榮之典此次大皇帝遣師遠涉到京之日首先安民又於和議
要端盡力維持特伸公論東方大局賴以保全義聞仁聲昭布遐
邇朕心尤爲欣感並令該大臣代達謝忱惟望大皇帝盡棄前嫌
益敦夙好唇齒輔車之誼歷久彌親從此海宇乂安昇平同享惟
大皇帝鑒察焉敕諭文曰皇帝敕諭頭品頂戴戶部右侍郎那桐
朕維交鄰之道詳於古經遣使之文著爲令典矧在同洲之國尤
切輔車之依茲因大日本國使館書記生杉山彬在京被戕朕心
惋惜宣示優榮特授爾爲欽差專使大臣親齎國書前往呈遞務
宜殫竭忠誠敬謹將事於一切交際儀文悉心經理勉副皇華之
選益聯與國之歡爾其欽承朕命無負委任特諭請代奏軍機大
臣奉旨所有國書敕諭著准其照辦甲申諭軍機大臣等奕劻李
鴻章效電悉日使函稱醇親王使德回路經美暨日本政府望旌

節抵日藉伸同洲和好之誼等語著照所請以重邦交英比如有此意函請亦可准行即由該王大臣隨時知照辦理仍一面電聞諭朕欽奉皇太后懿旨爲政之要首重人才聞出洋華商子弟就近游學者頗多可造之才著各出使大臣留心察訪如有在外洋大書院肄業精通專門之學領有憑照或著有成書者准由各使臣認真查訪分別等第咨送回華由政務處奏請簡派大臣按其所學分門考試交卷後帶領引見聽候錄取予以進士舉人貢生出身俟將來著有實在勞績即當重予擢用所有考試章程及考取姓名籍貫年貌著分別咨送各該衙門查照該使臣等務當切實考選毋得以並無實學者濫竽充數至使徒勞往返用副朝廷搜羅俊乂實事求是之至意是日諭陝西學政沈衛奏呈進書籍請將校刊各員紳懇恩獎勵一摺據稱三原涇陽兩縣官紳刊刻

書籍不下二百餘種均關典要該員紳等捐集經費校刊精勤有功學校深堪嘉尚國子監學正銜舉人劉光贊著賞加五品銜西安駐防舉人候選通判成安著以知州分省補用已故五品銜孝廉方正恩貢生賀瑞麟著追贈五品卿銜已故湖北試用知府劉昇之已故候選知府劉質慧已故道銜增貢生劉昌復均著追贈三品銜郎中銜中書科中書柏森著賞加四品銜道銜監生劉嗣曾同知職銜劉昌晉均著傳旨嘉獎以示鼓勵六月庚子諭禮部奏萬壽禮儀一摺自乘輿播遷以來宗社陵寢典禮闕如北望觚稜倍深感觸况我聖母皇太后蒙塵在外寢饋未安俯念時艱憂勤靡已上年萬壽聖節曾諭令停止一切典禮今朕生辰尙復何心受賀是日朕恭詣皇太后前行禮後即御便殿王公百官按班行禮所有筵宴一切典禮均著概行停止該部即遵諭行諭軍機

大臣等現已屆六月各國之兵究竟何時撤盡京使館留兵若干天津及沿途洋卡各留兵若干著奕劻李鴻章查明具奏辛丑諭軍機大臣等奕劻李鴻章現在和議已定公約何日畫押著即電聞以慰塵系癸卯諭從來設官分職惟在因時制宜現當重定和約之時首以邦交爲重一切講信修睦尤賴得人而理從前設立總理各國事務衙門辦理交涉雖歷有年所惟所派王大臣等多係兼差恐未能殫心職守自應特設員缺以專責成總理各國事務衙門著改爲外務部班列六部之前簡派和碩慶親王奕劻總理外務部事務體仁閣大學士王文韶著授爲會辦外務大臣工部尙書瞿鴻禨著調補外務部尙書授爲會辦大臣太僕寺卿徐壽朋候補三四品京堂聯芳著補授外務部左右侍郎所有該部應設司員額缺選補章程並堂司各官應如何優給俸糈之處著

政務處大臣會同吏部妥速核議具奏甲辰諭現在總理各國事務衙門已改爲外務部特設專官簡派重臣其前在該衙門行走之崇禮桂春那桐溥興均著毋庸兼差戊申電諭奕劻李鴻章劉坤一張之洞等前後論俄事各電均覽悉二月初間中外諸臣僉言俄約一成即起瓜分之禍朝廷熟思利害不得不爲停畫此事勢之當然本無成見自是之後李鴻章誤以畫約爲劉坤一張之洞所阻至有江鄂爲日人所愚之言劉坤一張之洞又以李鴻章爲偏執已見亦有全權爲俄人所愚之言彼此積疑負氣爭論究於國事何補該大臣等受恩深重上年共扶危局各著勤勞方深倚賴國步至此同心戮力猶懼不濟何忍自相水火貽憂君父見笑外人平心而論李鴻章身處其難原多委曲然時有不受商量之失劉坤一張之洞慮事固深而發言太易亦未免責人無已要

之俄約自難全廢終當設法改訂俄人交還東三省若仍奪我兵
權利權名還而實不還害豈可言且各國起而效尤則內地之禍
何堪設想必須乘公約既成之際向俄使商定前約婉與磋磨並
即照會各國公使請爲公議便可詢問關東撤兵日期以觀動靜
若能將東三省許各國通商得互相牽制之益庶幾根本之地可
保全局亦安應如何辦理之處著責成奕劻李鴻章趕緊籌商務
臻妥善速行具奏劉坤一張之洞有會辦之責亦不准置身事外
特此開誠申諭該大臣等同一竭忠謀國務各捐除意見和衷經
畫挽回氣數共濟艱難實有厚望爾功爾過不能逃朝廷洞覽也
己酉奕劻李鴻章電致行在軍機處電旨謹悉京城地面各國已
陸續交出俄美兵除留護使館外餘早撤盡英德日本亦撤過半
保定僅有法兵未撤聞各國現存在京兵隊望後可再撤三分之

一俟西安啓蹕再撤二分之一俟由河南回鑾即全數撤退彼等
撤兵向不知照撤去若干即問亦不以實告總稱看運船多寡陸
續撤去其各使館留兵現無確數聞統計約在二千內外天津及
沿途洋卡每卡約三百共計不逾二千屢經訪詢均稱回鑾早則
撤兵速遲則更多觀望請代奏軍機大臣奉旨蒸電覽悉殊堪詫
異據稱京使館留兵二千核與該王大臣前奏使館留兵共計僅
數百名之語大相懸殊即天津及沿途留兵之數亦多至萬人回
鑾所以慎重者本因公約未畫洋兵未撤之故乃該王大臣於畫
約遲早全未奏及昨經電詢始云不再畫約前據稱撤兵日期有
六月內全撤之語今又云由河南回鑾始行全撤亦屬前後兩歧
宵旰憂勞無一日不繫念於此該王大臣此奏獨不爲朝廷設想
於心安乎辛酉奕劻李鴻章電致行在軍機處和議大綱佳電聲

明最要只賠欸禍從兩端十五日據各使照會附送還欸表一紙
前五年除付利外每年帶還本不及百萬嗣後按年遞加至三十
九年止通共還本利九百八十二兆二十三萬餘兩較從前各表
所省尙多所指抵欸仍如前電鹽課釐金並常關進項餘剩之新
關各稅及進口稅切實值百抽五並免稅各貨酌量照徵內惟常
關應歸新關管理此外並不干預惟知目前財力艱窘允緩半年
付利由西歷明年正月初一日即華冬月廿二起照付仍將此半
年息銀分三年帶付此外詳細節目正在推敲至外省禍從專屬
英法兩國催據該使核定送到內有輕減者即日繕具摺單馳奏
務求早降明諭惟奉電旨催令畫押臣等派員催詢已可就範昨
德使穆默來臣鴻章寓密商將前後所議已定未定各欸用洋文
臚列擬成一約據稱各使意見不一宜再立約以整齊之以免撤

兵遲誤內惟禁軍火通商行船兩款尙未議及伊等以運進軍火
暫停二年通商各事頭緒繁多非目前能定惟吳淞口天津海河
淤淺過甚必須中外合力集資修濬此當載入約內伊等擬再會
議一次即定稿互商畫押此押一畫各國訂於七月初二以前將
京城洋兵除留護使館外餘俱撤淨合先詳細奏聞仰慰聖座請
代奏上諭軍機大臣奕劻等寄電悉吳淞口天津海河係天然攔
沙並非淤淺此事本不在原約內自應另與磋商不得混入此次
約內且查薩使前遣傑彌遜赴江鄂時據劉坤一來電言傑曾面
稱如能將吳淞淤沙許彼開通即加稅值百抽十二五亦未嘗不
可商辦等語是開沙於彼大有利益於我有無窒礙更應細酌辦
理著奕劻李鴻章即據此向商妥籌另議爲要七月甲子朔諭前
擇七月十九日回鑾早經降旨宣示朕侍奉聖母皇太后無日不